




誠意伯先生詩鈔

と
793

柳田文庫
文庫11
D 221
1



溪棊垣內先生集

誠意伯詩鈔 全四冊

書肆 世壽堂

文
D 221
1

劉文成公詩鈔序

靈氣稟天靈心成我我之靈心縱之
於時而不朽之業成焉古之作者是
已韜略具古妙用存我我之妙用施
之於世而撥亂之功成焉古之豪傑
是已太師誠意伯劉文成公豈其人
乎先生以命世之才當風雲之會明
良之時弼真主於元季救生靈於塗

010190556714

炭以成文明之化永闡朱明一代之
鴻基亦能令朱明一代文章煥乎明
者先生之功居多豈非妙用存我而
施之於世靈心成我而縱之於時者
邪孔子曰有文事者必有武備信矣
予詳閱其集風雲之氣萃雷霆之音
轟鬱律晦冥幻化曷極訇殷砰鏗神
變叵測泰山喬嶽列焉長江巨渤運

焉渾渾噩噩周雅乎漢章乎其胸次
固有如斯者存焉蓋明氏二百年閒
洪才輩出各以其所能相夸張旗鼓
交振其筆陣縱橫非無與先生相抗
者也詞源渾雄非無與先生同歸者
也杜行而李趨亦非無與先生頡頏
者也至於深衷寓微奧旨不露遠大
自期徒文不苟獨以名教爲己任傷

時之心隱然以古風爲其宗排邪之意廓如則其誰能與先生連鑣並軫者也允爲朱明一代雄文矣予嘗謂豪傑之人未必能造豪傑之語能造豪傑之語者未必是真豪傑豪傑之才未必能成豪傑之事能謀豪傑事者未必是真豪傑豪傑之人而能造豪傑之語豪傑之才而能成豪傑之

事者我見之文成南紀詩人垣子固先抄遺山詩紹有斯舉亦將抄空同大復二家集合刻行世可謂慧眼存古功斯道者也

備前 仁科幹撰

誠意伯詩抄序
 士固已刊遺山詩抄續纂劉文成青田詩
 欲行諸世亦詢序于余余笑而曰子憂斯
 文之衰不自省其身猥欲揮隻手而挽回
 之乎其志何過汰且侈也夫詩之興衰繫
 世運昇降可以觀風俗弛張然而風之所
 自上而下風之尚草靡然偃之固非眇乎
 布衣所得預焉然徒抱杞憂努目張膽汲
 汲乎此或近于僭恐受不知量之誚矣士

誠意伯詩抄序

誠意伯詩抄序
 士固已刊遺山詩抄續纂劉文成青田詩
 欲行諸世亦詢序于余余笑而曰子憂斯
 文之衰不自省其身猥欲揮隻手而挽回
 之乎其志何過汰且侈也夫詩之興衰繫
 世運昇降可以觀風俗弛張然而風之所
 自上而下風之尚草靡然偃之固非眇乎
 布衣所得預焉然徒抱杞憂努目張膽汲
 汲乎此或近于僭恐受不知量之誚矣士

固怫然色惡余復斂容進之曰吁士固勇
於見義而有爲誠如斯乎前言戲焉耳夫
昔在天朝之盛濟濟多士摘撿天之藻
以鳴其美者懷風尚矣平安定鼎鉛槧之
臣森然挺立人各握靈珠其可觀于今者
文粹之撰最著矣然時所趨向在彼中唐
以下限以元白爭巧於一聯片句其盛竟
不及倭歌遠矣蓋時雖文物備具赫灼可
觀風習苟且下無專力自奮者之過也自

是斯道日陵遲保平亂後篇什傳者無題
之集寥寥貽遺韻縉紳之作絕響于此矣
自武門代秉天下之柄滋益汙下加以
戰擾相繼干戈不休鎌倉室町之世緇流
厘掌文職其陋頗甚於戲物極而變事往
而復天亦厭禍亂更闡文明之運而真人
出乎東海慶元以還奎光呈祥璧圖煥然
自是世覃右文之教化洽宇內豪傑接踵
而起俊髦駢肩而出正德享保之際於是

誠意行詩指 月 二 帶 香 草 隱 病
爲盛時卓傑之士有爲之材戢鵬翼于雲
霄屈驥足于千里壹意專力以著述期不
朽竭精焦思不走他歧之功乘匡輔振起
之化身在華門圭竇而筆鋒抗衡于軒冕
陋巷抱經者私執翰墨之權其所以潤色
鴻業鼓吹盛世愛出于懷風文粹之上與
海西文華自夸者駸駸爭馳幾將馱過之
斯文之盛開闢以來所未曾有也抑是雖
由上之甄鈞而化成之然下之自奮激而

致精力其効亦偉矣其後風習屢變厭故
趨新互相排擠攻擊以取勝以譏斥爲務
然審觀其所變所謂一蠲下於一蠲竟至
于今矣夫今之與昔上之治化不但無損
有加其如文教尤益弼張然而下之鼓舞
如此卑何耶蓋治安日久學者慣無事氣
弛志解苟且因循取喜于俗而欲其伎速
售歟安寢飽食優游卒歲者盡是太平之
賜也已然何不思所以報其萬一却沮撓

雄大隆盛之政洵以卑懾淺薄之辭若使
後世議今則以爲如何子有見于此乎雖
周盛德江漢汝墳之咏興于下然後鹿鳴
文王可鳴諸廟堂蘋蘩行潦之誠孚于俗
然後清廟維清之頌可贊成功矣風之所
動必先自下勢自然已故三百篇大半出
于田畯紅女被諸筦絃則自邦國諸侯延
及房中鄉閭取以助風化何僭之有况彼
青田劉公者間氣所鍾天資英特身屈下

僚恤民之誠寤寐不忘然讒慝害之荐挫
其志知事不可爲悠然揖去而觀時變及
遇英主幄籌所算不動聲色而夷強寇猾
賊以拯天下塗炭識見之高材畧之大誰
得端倪真所謂命世人豪也夫其鬱勃所
洩悲觀憂喜怒罵戲笑發爲吟咏皆方寸
所蟠精氣英膽故其詩如霄間鸞鷲天半
虬龍飛翔天矯光彩絢爛目眩氣奪不可
嚮邇使彼囁嚅爲兒女語媚世諂俗者受

而讀之稍強其氣以胸間磊塊鳴淪淪大風于當時則萬世之下仰今日之盛復謂巍乎大哉若夫然則子眇身為斯舉亦關于文運隆替而有助治化豈可弗汲汲而強哉前言戲焉耳子請勉之遂序丙申九月松廬居士野呂隆訓撰于湯淺僑居

誠意伯傳

明史

劉基字伯溫青田人曾祖濠仕宋為翰林掌書宋亡邑子林融倡義旅事敗元遣使簿錄其黨多連染使道宿濠家濠醉使者而焚其廬籍悉毀使者計無所出乃為更其籍連染者皆得免基幼穎異其師鄭復初謂其父爚曰君祖德厚此子必大君之門矣元至順間舉進士除高安丞有廉直聲行省辟之謝去起為江浙儒學副提舉論御史失職為臺臣所阻再投劾歸基博通經史於書無不窺尤精象緯之學西蜀趙天澤論江左人物首稱基以為諸葛孔明儔也方

國珍起海上掠郡縣有司不能制行省復辟基爲元帥府都事基議築慶元諸城以逼賊國珍氣沮及左丞帖里帖木兒招諭國珍基言方氏兄弟首亂不誅無以懲後國珍懼厚賂基基不受國珍乃使人浮海至京賄用事者遂詔撫國珍授以官而責基擅威福羈管紹興方氏遂愈橫亡何山寇蜂起行省復辟基勦捕與行院判石抹宜孫守處州經畧使李國鳳上其功執政以方氏故抑之授總管府判不與兵事基遂棄官還青田著郁離子以見志時避方氏者爭依基基稍爲部署寇不敢犯及太祖下金華定括蒼聞

基及宋濂等名以幣聘基未應總制孫炎再致書固邀之基始出既至陳時務十八策太祖大喜築禮賢館以處基等寵禮甚至初太祖以韓林兒稱宋後遙奉之歲首中書省設御座行禮基獨不拜曰牧豎耳奉之何爲因見太祖陳天命所在太祖問征取計基曰士誠自守虜不足慮友諒劫主脅下名號不正地據上流其心無日忘我宜先圖之陳氏滅張氏勢孤一舉可定然後北向中原王業可成也太祖大悅曰先生有至計勿惜盡言會陳友諒陷太平謀東下勢張甚諸將或議降或議奔據鍾山基張目不言太祖

召入內基奮曰主降及奔者可斬也太祖曰先生計安出基曰賊驕矣待其深入伏兵邀取之易耳天道後舉者勝取威制敵以成王業在此舉矣太祖用其策誘友諒至大破之以克敵賞賞基基辭友諒兵復陷安慶太祖欲自將討之以問基基力贊遂出師攻安慶自旦及暮不下基請逕趨江州擣友諒巢穴遂悉軍西上友諒出不意帥妻子奔武昌江州降其龍興守將胡美遣子通款請勿散其部曲太祖有難色基從後蹋胡牀太祖悟許之美降江西諸郡皆下基喪母值兵事未敢言至是請還葬會苗軍反殺金處

守將胡大海耿再成等浙東搖動基至衢為守將夏毅諭安諸屬邑復與平章邵榮等謀復處州亂遂定國珍素畏基致書唁基答書宣示太祖威德國珍遂入貢太祖數以書即家訪軍國事基條答悉中機宜尋赴京太祖方親援安豐基曰漢吳伺隙未可動也不聽友諒聞之乘間圍洪都太祖曰不聽君言幾失計遂自將救洪都與友諒大戰鄱陽湖一日數十接太祖坐胡牀督戰基侍側忽躍起大呼趣太祖更舟太祖倉卒徙別舸坐未定飛礮擊舊所御舟立碎友諒乘高見之大喜而太祖舟更進漢軍皆失色時湖

中相持三日未決基請移軍湖口扼之以金木相犯日決勝友諒走死其後太祖取士誠北伐中原遂成帝業畧如基謀吳元年以基爲太史令上戊申大統曆熒惑守心請下詔罪己大旱請決滯獄卽命基平反兩隨注因請立法定制以止濫殺太祖方欲刑人基請其故太祖語之以夢基曰此得土得衆之象宜停刑以待後三日海寧降太祖喜悉以囚付基縱之尋拜御史中丞兼太史令太祖卽皇帝位基奏立軍衛法初定處州稅糧視宋制畝加五合惟青田命母加曰令伯溫鄉里世世爲美談也帝幸汴梁基與左

丞相善長居守基謂宋元寬縱失天下今宜肅紀綱令御史糾劾無所避宿衛官侍有過者皆啟皇太子置之法人憚其嚴中書省都事李彬坐貪縱抵罪善長素暱之請緩其獄基不聽馳奏報可方祈雨卽斬之由是與善長忤帝歸愬基僂入壇壝下不敬諸怨基者亦交譖之會以旱求言基奏士卒物故者其妻悉處別營凡數萬人陰氣鬱結工匠死齒骸暴露吳將吏降者皆編軍戶足干和氣帝納其言旬日仍不雨帝怒會基有妻喪遂請告歸時帝方營中都又銳意滅擴廓基瀕行奏曰鳳陽雖帝鄉非建都地王保

保未可輕也已定西失利擴廓竟走沙漠迄爲邊患其冬帝手詔敘基勲伐召赴京賜賚甚厚追贈基祖父皆永嘉郡公累欲進基爵基固辭不受初太祖以事責丞相李善長基言善長勲舊能調和諸將太祖曰是數欲害君君乃爲之地耶吾行相君矣基頓首曰是如易柱須得大木若束小木爲之且立覆及善長罷帝欲相揚憲憲素善基基力言不可曰憲有相才無相器夫宰相者持心如水以義理爲權衡而已無與者也憲則不然帝問汪廣洋曰此褊淺殆甚於憲又問胡惟庸曰譬之駕懼其僨轅也帝曰吾之相

誠無逾先生基曰臣疾惡太甚又不耐繁劇爲之且孤上恩天下何患無才惟明主悉心求之目前諸人誠未見其可也後憲廣洋惟庸皆敗三年授弘文館學士十一月大封功臣授基開國翊運守正文臣資善大夫上護軍封誠意伯祿二百四十石明年賜歸老於鄉帝嘗手書問天象基條答甚悉而焚其草大要言霜雪之後必有陽春今國威已立宜少濟以寬大基佐定天下料事如神性剛嫉惡與物多忤至是還隱山中惟飲酒奕棋口不言功邑令求見不得微服爲野人謁基基方濯足令從子引入茆舍炊黍飯

言意作本傳
令令告曰某青田知縣也基驚起稱民謝去終不復見其鞫跡如此然究爲惟庸所中初基言甌括間有隙地曰談洋南抵閩界爲鹽盜藪方氏所由亂請設巡檢司守之奸民弗便也合茗洋逃軍反吏匿不以聞基令長子璉奏其事不先白中書省胡惟庸方以左丞掌省事挾前憾使吏訐基謂談洋地有王氣基圖爲基民弗與則請立巡檢逐民帝雖不罪基然頗爲所動遂奪基祿基懼入謝乃留京不敢歸未幾惟庸相基大感曰使吾言不驗蒼生福也憂憤疾作八年三月帝親製文賜之遣使護歸抵家疾篤以天文書

授子璉曰亟上之母令後人習也又謂次子璟曰夫爲政寬猛如循環當今之務在修德省刑祈天永命諸形勝要害之地宜與京師聲勢連絡我欲爲遺表惟庸在無益也惟庸敗後上必思我有所問以是密奏之居一月而卒年六十五基在京病時惟庸以醫來飲其藥有物積腹中如拳石其後中丞涂節首惟庸逆謀并謂其毒基致死云基虬髯貌修偉慷慨有大節論天下安危義形於色帝察其至誠任以心膂每召基輒屏人密語移時基亦自謂不世遇知無不言遇急難勇氣奮發計畫立定人莫能測暇則敷陳

王道帝每恭已以聽常呼為老先生而不名曰吾子
房也又曰數以孔子之言導予顧帷幄語秘莫能詳
而世所傳為神奇多陰陽風角之說非其至也所為
文章氣昌而奇與宋濂並為一代之宗所著有覆瓿
集犂眉公集傳於世

詩意任才作
卷一
帶香草

誠意伯詩鈔卷之一

日本紀伊垣內保定子固氏纂

古樂府

巫山高

巫山高哉鬱崔嵬下有江漢浮天回深林日月照不
到洞谷闔闢生風雷危峰半出赤道上落日猿狖鳴
聲哀虎牙赤甲鬪雄壯風氣以之而隔閔楚王遺跡
安在哉但見麋鹿跳蒿萊當時忠臣放澤畔乃與靳
尚相徘徊山中妖狐老不死化作婦女蓮花腮潛形
謫跡託夢寐變幻涕泪成瓊瑰神靈震怒不可禱雲

錢牧齋云刺奇
后也庚申君寵
高麗奇妃立以
為后專權植黨
濁亂宮闈故作
以諷諫矣

誠意伯詩鈔 卷一 帶香草

霧慘淡昏陽臺。猛風吹雨洗不盡。假手秦炬歆飛灰。
精誠感應各以類。世間妖孽匪自來。君不見商王夢
中得良弼。傅巖之美今安匹。巫山何事近楚宮。終古
怨恨流無窮。

戰城南

朝戰城南門。暮戰城北郭。殺氣高衝白日昏。劍光直
射旄頭落。聖人以五服限夷夏。射獵耕織各自安。土
風胡為彼狂不自顧。而與大國爭長。雄高帝定天下。
遺此平城憂。陛下宵旰不遑食。擁旄仗鉞臣不羞。登
南城望北土。雲茫茫土膺膺。蚩尤禡牙雷擊鼓。舉長

戟揮天狼。休屠日逐渾邪王。鐘車尾尾連馬羊。橐駝
載金人。照耀紅日光。逍遙而來歸。帝鄉歸帝鄉。樂熙
熙際天所覆。罔不來。小臣獻凱未央殿。陛下垂拱安
無為。

思悲翁

弱齡輕日月。邁景想神仙。顧往諒無及。待來徒自憐。
黃金棄砂礫。劬心鍊丹鉛。鑿石不得水。沉劍徒窺淵。
流光不我與。白髮盈華顛。杖策出門去。十步九不前。
歸來對妻子。塵竈午未煙。于時之計策。退耕無園田。
霜蒲怨青松。逝矢恨驚弦。已矣復何道。吞聲赴黃泉。

于乾隆本作午非

聖人出

聖人出臨萬方赤若白日登扶桑陰靈韜精星滅芒
群氛辟易歸大荒晡曉寒谷熙春陽枯根發茁暢幽
藏潛魚躍波谷鳥翔花明草暖青天長青天長聖人
壽北斗軒轅調氣候北辰中居環列宿八風應律九
歌奏圓方交格神靈輳聖人出陽道開億萬年歌康
哉

赤恐赫之誤

釣竿

斫竹作釣竿抽繭作釣絲滄洲日暖波漣漪綠蒲茸
茸柳葉垂鈎織餌香魚不知石鱗激水溪毛動玉燕

迴翔竿尾重大魚入饌腮頰紅小魚却放洲云中更
祝小魚知我意長逝深潭莫貪餌

思美人

雨欲來風蕭蕭披桂枝拂陵茗繁英隕鮮葉飄揚煙
埃靡招搖激房帷發綺綃中髮膚憺寂寥思美人隔
青霄水渺茫山峒堯雲中鳥何翛翛欲寄書天路遙
東逝川不可邀芳蘭花日夜凋掩瑶琴閑玉簫魂眾
眾心摇摇望明月歌且謠聊逍遙永今宵

上清詞

王子晉好吹笙吹得神仙下玉京一朝羽化隨風去

邀明詩綜作要

回首故宮芳草生。
河漢水九秋清涼月滿空聞雁聲雁聲不到夢先到。
白露濕衣天未明。

漢宮曲

小雨如烟畫掩扉。捲簾忽見燕雙飛。不知春色能多少。總向昭陽柳上歸。

江上曲

數樹垂楊綠水邊。問郎何不繫蘭舫。浦沙新漲青山遠。半夜月明無杜鵑。
曾記樓船夜泊時。家家絃管鬪腰肢。于今絃管歸何

處。縮束枯蒲當酒旗。

昨夜月明天似水。今晨月落水如天。天長水遠人何處。蘆葦蕭蕭一抹烟。

紅蓼丹楓一色秋。楚雲吳水共悠悠。人間萬事西風過。惟有滄江日夜流。

寒夜謠

今夕何夕歲聿其徂。草木凋落山川縈紆。瞻彼鴻雁拂翼天衢。雖和鳴載悠載徐。雖無羽翰心與之俱。華月出雲青燈在。偶歌以寫懷云何其吁。

墻頭花

墻頭花紅錦妬美人抱瑟倚高樓只恐花飛逐風去
熒熒絳蠟送殘宵燕語鶯啼斜日暮

望行人

朝聽乾鵲鳴暮見燈花結鵲鳴燈結無定期鏡裡青
雲看成雪人生百歲難長保天上孤鸞海中老滔滔
逝水不迴西灼灼秋花幾時好一朝復一朝一夕復
一夕只恐君心念妾時妾身已作山頭石

王子喬

王子喬乃是髭王之子皇王之孫深宮洞房不稱意
却駕白鶴尋軒轅虹蜺為旆雲為旛飄然乘風上崑崙

錢收齊云刺愛
獻識里達臘也
太子阻兵拒父
白瑣任挾以出
奔不稱主器宗
社將覆故託以

刺焉

崑崙王子喬去何之朝發暘谷暮崦嵫六龍九鳳相追
隨穆王西上不得王母訣胡為元氣獨爾私王子喬
去不還后稷功業委如山猶有九鼎知神姦王城日
夕生芴管爾獨胡為白雲間王子喬空長歎

走馬引

天溟溟雲濛濛當天白日中貫虹壯士拔劍出門去
手提仇頭擲草中擲草中血漉漉追兵夜至深谷伏
精誠感天天心哀太一乃遣天馬從天來揮霍雷電
揚風埃壯士呼天馬馳橫行白晝吏不敢窺戴天之
耻自古有必報天地亦與相扶持夫差徒能不忘而

又云明宗被弒
于晃忽又庚申
帝即位七年乃
以尚書之言撤
文宗主于大廟
而詔書但以私
圖傳子為言昧
于春秋復仇之
大義矣公此詩
蓋深譏之也

會乾隆本作會
非
別
字

報越棲於會誓又縱之始知壯士獨無媿魯莊愁紹
何以爲人爲

梁甫吟

誰謂秋月明蔽之不必一尺翳誰謂江水清淆之不
必一斗泥人情且暮有翻覆平地倏忽成山谿君不
見桓公相仲父豎刁終亂齊秦穆信逢孫遂違百里
奚赤符天子明見萬里外乃以蕙苴爲文犀停婚什
碑何震怒青天白日生虹蜺明良際會有如此而况
童角不辨粟與稊外間皇父中艷妻馬角突兀連牝
鷄以聰爲聾狂作聖顛倒衣裳行蒺藜屈原懷沙子

又云此詩艷妻
牝鷄亦爲奇后
而作也
賢列朝詩集作
雲非

中乾隆本作申
非

昏棄魑魅叫嘯風淒淒梁甫吟悲以悽岐山竹實日
稀少鳳皇憔悴將安棲

墙上難爲趨行

弱水不可以航石林不可以車人生貴守分墙上難
爲趨茫茫八極內狹徑交通衢紛紛皆轍迹擾擾論
錙銖焦原託齊踵龍頷夸深珠片言取卿相盃酒興
剪屠機事一朝露妻子化爲魚林間有一士蓬蒿翳
窮廬種稻十數畝種桑八九株有酒且飲之無事即
安居孰知五鼎食聊保百年軀悠悠身後事汲汲復
何如

獨漉篇

獨漉復獨漉。月明江水濁。水濁迷龍魚。月明復何如。
 楚國皆濁。屈原獨清。行吟澤畔。哀哉不平。上山采茶。
 下山采藥。心在腹中。何由可白。豺狼在後。虎豹在前。
 四顧無人。魂飛上天。珠玉委棄。不如泥沙。躡冠戴履。
 萬古悲嗟。

懊懷歌

白鷗養雛時。夜夜啼達曙。如何羽翼成。各自東西去。
 昨夜霜風起。入戶復吹帷。兒啼母心酸。母愁兒不知。
 養兒圖養老。無兒生煩惱。臨老不見兒。不如無兒好。

魏列朝詩集作
 惡圖作徒俱非

食藥苦在口。食蓮苦在心。苦心無人知。苦口淚沾襟。
 男兒初生時。蓬矢桑弧弓。老大却思家。懊惱無終窮。

王昭君

漢庭不賞微功。士昭君却向胡中死。昭君辭漢入胡
 中。胡女悲愁。漢嬪喜合。情欲怨當。語誰手。彈琵琶。淚
 沾衣。掖庭望幸。從此絕。巫山有路。他生歸。殷勤說與
 上林雁。好在明年再相見。漢恩如海。長自深。妾自生
 來。命如綫。賤妾一身。何足惜。可惜當年。劉敬策。遂令
 上策重。和親欲倚。紅顏清塞塵。只恐妾身先。草露漢
 宮無復如花人。

此詩恐為五首者而看者可置者非

上山采蘼蕪

上山采蘼蕪。山峻路迢遞。下山逢故夫。悲風生羅袂。憶昔結髮時。願得終百年。變故不可期。中道相棄捐。蓮實生水中。石榴生路側。未嘗掛齒牙。中心豈能識。上山采蘼蕪。羅袖生芳菲。因君贈新人。莫遣秋霜霏。落葉辭故枝。不寄別條上。白日無回光。誰能不惆悵。

玉階怨

長門燈下淚。滴作玉階苔。年年傍春雨。一上苑牆來。

宛轉歌

星稀月白。河闌干。飢蟲顛號。莎草寒。美人望月。歌宛

轉。瀟湘水碧。蒼梧遠。愁魂一夜不得歸。化作斷雲。天際飛。

朗月行

朗月何朧朧。照我綺牕中。牕中美人不能寐。起看玉宇生。秋風秋風飄飄吹木末。纖雲卷盡懸明月。明月隨風出海來。海水蕩漾龍鱗開。寒光噴漫碧落外。白浪湧作金銀臺。何處悲風怨。羌管誰家舞榭笙簧暖。長信宮中漏水長。昭陽殿裡更籌短。漏長更短總含情。開窓坐視河漢傾。廣寒宮在何處。欲往從之渺煙霧。青雛汗漫不可期。桂華如雪東方曙。

大牆上蒿行

牆上蒿方春擢秀何芄芄炎天六月旱無雨枝葉枯
死隨飄風世情翻覆不可擬人生有身莫依倚君不
見樊將軍一朝函首西入秦又不見劉越石仰天長
歌握中璧三士自殘因二桃子昏終棄吳江濤世人
見機苦不蚤何不看取牆上蒿

聖列朝詩作早

邯鄲才人嫁為厮養卒婦

邯鄲有才人艷色如朝霞嫁作厮養婦雲髮埋泥沙
憶昔趙王全盛日夜夜綺筵張寶瑟中山美酒盈羽
觴一咲黃金滿千鎰繁華過眼如轉蓬故宮禾黍秋

芄芄明珠白璧走函谷墜簪遺珥空悲風人生最苦
是衰老白首無歸向誰道華門夜永月光寒臥聽鴛
駝齧枯草

出塞

居延風高榆葉空狼烟夜照甘泉宮將軍授鉞虎士
怒蚩尤直天旗尾紅麒麟前殿催賜酒已覺此身非
己有猛氣遙將日逐吞壯心肯落嫖姚後雁門城外
沙如雪玉帳霜濃鍊衣折長劍須披瀚海雲哀笳莫
怨天邊月北風烈烈刁斗鳴回看北斗南方明驚箭
離弦車在坂不勒燕然終不返

孤兒行

蓬頭毆足誰家兒。滿面塵埃雙淚垂。爺娘棄我不待。
老骨肉無人。但兄嫂兩身。一氣不相知。陌路茫茫向。
誰道。清晨采薪日入歸。殘羹冷飯難充飢。欲言問兄。
兄不顧。嫂是他人更奚訴。人生一世為弟兄。同根自。
合。同枯榮。爺娘在日曾眷戀。願兄回看死人面。

蜀國弦

胡茄拍斷玄冰結。湘靈曲終斑竹裂。為君更奏蜀國。
弦。一彈一聲飛上天。蜀國周遭五千里。峩眉岌岌連。
玉壘。岷嶓出水作大江。地盡天浮戒南紀。舒為五色。

錢牧齋云此詩亦有感于文宗兄弟之間而作

本集明本清本皆一首獨錢牧齋列朝詩選以四句一首分為七篇猶東坡竹枝詞本一首別為九首併分俱可

朝霞暉慘為虎豹。嗥陰霏翕為十嶂。雲雨入壠為百。
里。雷霆飛白鹽。雪消春水滿。谷鳥相呼錦城暖。巴姬。
倚歌。漢女和。楊柳壓橋花纂纂。銅梁翠氣通青蛉。碧。
鷄啼落天上星。山都號風寡。狐泣杜鵑鳴。咽愁幽冥。
商悲羽怒聽未了。窮猿三聲巫峽曉。瞿塘噴浪翻九。
淵。倒瀉流泉喧木杪。樓頭仲宣羈旅客。故鄉渺渺皆。
塵隔。含悽更聽蜀國音。不待天明頭盡白。

雙燕離

雙燕營巢時。雙飛復雙語。輕盈柳陌風。振迅芹塘雨。
巢成近繡幃。雙宿更雙飛。為蒙主人愛。不信有睽違。

四月溫風起。榴花發紅葢。拾蟲還哺雛。出入無停晷。
五月教雛飛。繞巢舞烏衣。側避蛛絲過。斜縈柳線歸。
六月雛翼老。分飛各相保。脉脉傷珠簾。依依集蘭綯。
世事有轉旋。陵谷一朝遷。昆明延劫火。甲第化歛煙。
帶睡驚飛出。風沙兩相失。死生不得知。嬾婉從茲畢。
回看舊主人。粉黛成灰塵。天高塵渺渺。海濶波鱗鱗。
荏苒朝還暮。惇惇向何處。毛凋半夜霜。淚滴三春露。
露寒霜又濃。憔悴不成容。同心諒難隔。魂魄終相從。

武陵溪

武陵溪一何深水有射工射人影陸有丹蛇長百尋

明本尚字闕今以乾隆本補之

嗟哉武溪不可臨。溪之水深且闊。鳥不敢飛。龍不敢
越。海氣連天。日月昏。尚露着人。肌肉裂。嗚呼丈夫寧
能。沙場百戰死。有骨莫葬武谿水。

短歌行

來日苦短。去日苦長。日長不自覺。日短令人傷。君不
見望後月。又不見霜中。蓋清光縱好。魄已虧。芳心欲
動。根先死。少年不知老。可悲衰老却憶少年時。

隴頭水

隴頭水。征夫淚。征夫之淚滴。隴頭化爲水。入秦川。流
水。向秦川。嗚咽鳴不已。何因得天風。吹入君王耳。

誠意台詩抄

卷一

十一

帶香堂閣藏

蛺蝶行

軟芳晞露春鮮妍。上有蛺蝶飛翩翩。暖風扶暝撲天起。翠重紅輕迷欲死。東園無花畱不住。相隨又過西園去。沉沉斷夢失韓憑。却抱霜華怨秋曙。

鈞天樂

君不見天穆之山二千仞。天帝所以觴百靈。三嬪不下。兩龍去。九歌九辯歸杳冥。我忽乘雲夢。輕舉身騎二虹臂。六羽指揮開明關。帝關環佩泠泠曳。風雨明月照我足。倒影搖雲端。參差紫鸞笙。響震瑤臺寒。我欲聽之未敢前。空中接引皆神仙。煙揮霧霍不可測。

翠葩金葉光相射。鯨鐘虎麓鏗鴻濛。撼昆侖兮殷崆峒。揚天桴兮伐河鼓。咸池波兮析木風。遂升泰階朝玉帝。側身俯伏當瓊陛。訊曰太極拆裂爲乾坤。紛紛枝葉皆同根。胡爲妄主水火金木土。自使激搏相熬煎。臣聞三皇前。群物咸熙熙。衆子戴一父。皞皞無偏私。忽然元氣自蕩滲。變換白黑分賢痴。蚩尤與黃帝。從此興戈矛。流毒萬萬古。爭奪無時休。骨肉自殘賊。帝心至仁能不憂。帝不荅。臣心迷。風師咆哮虎豹怒。銀漢洶湧天雞啼。颯輪撇捩三嶋過。海水盡是青玻璃。神奔鬼恠惕驚起。遺音颯颯猶在耳。夢耶遊耶不

詩意作言金
可知但見愁雲漠漠橫九疑

從軍五更轉

一更戍鼓鳴市上斷人聲風吹鴻雁過憶弟復思兄
二更月上城照見兜鍪光側身望山川淚落百千行
三更悲風起樹上烏鵲鳴枕戈不能眠荷戈繞城行
四更城上寒刁斗鳴不歇披衣出戶視太白光如月
五更星斗稀霜葉光爛爛健兒爭先起拂拭寶刀看

隔谷歌

戰鼓咽悲風弓折不可把弟兄隔谷不相聞咫尺人間與泉下丈夫擔許國殺身非所憐兩心本一氣何

牧齋云此詩與
孤兒行皆為文
宗而作

能坐相捐登墀四顧望慨慷肝膽裂不見救兵來但
見繞城鐵甲光如雪飛禽在羅網尚或念其飢身為
高官馬食粟忍見手足居重圍相彼鴻與雁亦各顧
匹儔挽弓射一猿群猿拔箭聲啾啾鳥獸且有情人
心獨何尤嗚呼田家紫荆雖微木不忍聽君歌隔谷

氣出唱

今日不樂振策遠遊東上泰山巍何脩脩道逢仙人
要我同仇蒸霞為糧烹玉為羞玄英素粧光華蔓流
日觀齒齒葩華九州令我從之身輕若浮道以五鸞
翼以兩虬朝翔玄圃夕止蓬丘謁見王母雲眉月眸

青娥二千。或舞或謳。風吹琅玕聲如鳴球。襍花並開。
 莫知春秋。洪崖先生勸我此留。自揣凡骨非仙者儔。
 七情交煎。一觸百抽。又病驚僻。無藥可瘳。崇崇清宮。
 蕩無涯。輒列仙如沙。不少一漚。王母咲聽拜謝。扣頭。
 歸來山林。曷標曷鉤。熙熙泰和。長樂無憂。

燕歌行

霜飛動地。燕草凋沙。飛石走天。蕭條江河。倒影陵谷。
 搖白日慘淡。晝為宵。美人迢迢隔雲霄。青冥無梯海。
 無橋。魚枯雁死。星芒消。沉沉君不自慆。愁如驚風。
 鼓春潮。歲云暮矣。山寂寥。梧桐葉落空乾條。崑崙層

城阻且遼。蒼梧九疑。煙霧遙。瓊田瑤草。芟蕩。江離
 澤蘭成艾。蕭登高望。遠肝肺焦安得羽翼。搏長颯。

江南弄

湖波澄明日色鮮。畫鷁相隨出采蓮。嬌紅曼綠鬪春
 妍。鬪春妍倚徘徊。今朝花盡且歸去。明日更有新花
 開。
 采菱女子木蘭船。翠裙紅袖青玉鈿。搖光蕩影惜嬋
 娟。惜嬋娟。愁夕暉。拔蒲歌斷鯉魚入。歸去芰荷香滿
 衣。

行路難二首

君不見水上，漸往來，倏忽隨波移。又不見花上，蜂東
 枝飄落，尋西枝。世人食葵不食蕪，莫倚結交心匪石。
 君不見避席武安人，即是當年竇家客。
 君不見見白日光，不照幽草心。又不見石上雲，膚寸遂
 成陰。世間會合良難得，况有巧言能燥金。伏波棠蔭
 魏碑仆，當時豈是非。知音智謀啓疑忠，逆耳平地反
 掌生崎嶇。行路難愁最深。

野田黃雀行

野田雀，皆啄啄。朝食山下，木暮食山上。粟千百為群，
 叢薄裡。忽然驚飛，若蜂起。飛飛却落，稻田中。眾口齊

栗恐粟之誤啄
栗韵不協

啄稻為空。農夫力田望秋，至沐雨梳風盡，勞瘁王祖
 未了私債多。况復爾輩頻經過，野田雀鷹隼高翔不
 汝擊。農夫田父愁何極。

射虎詞

長戈如林，夾弓弩。言向深山射猛虎，獠兒蒙歇走如
 風。所過犬羊皆為空，紛紛散入人家宿。丁男上山婦
 女哭，前行聞虎心先畏。一虎當頭萬夫棄，折弓墜刃
 委如土。却向人前作威武。

苦哉行

雞不可使守門，狗不可使司晨。驅車梁弱水，日暮空

成意白詩

卷一

卷一

悲辛我欲乘風謁閻闔。虹蜺彌天雲霧合。九關虎豹
森駭人。長跪陳辭閣不答。錯石作璵璠。鬼神驚見歎。
截梁爲構榼。般垂拊膺淚交頤。衝風結玄冰。道惡不
可履。巫咸上天去。澤凍神著死。我欲竟此曲。此曲多
苦聲。鴻雁向天北。因之寄遐情。

起夜來

微月就沒銀河爛。城烏啞啞夜將半。憂愁不寐攬衣
起。仰看明星坐待旦。威弧歷落連天狼。兩旗欲動風
不揚。槐根王侯夢未覺。豈知雞聲堪斷腸。

長相思

長相思。妾在天南君在北。紅顏未必無人知。葑菲不
羨君王食。相思迢迢隔天河。長夜不眠愁奈何。欲憑
魂夢到君所。君門九重虎豹多。長相思向誰道。涼風
日夕吹桂枝。可惜馨香暗中老。

無愁果有愁曲

君不見陳家天子春茫茫。後庭玉樹凝冷光。樓船江
上走龍陣。宮中只報平安信。酒波灩灩蒸粉香。暖翠
烘烟妬嬌髮。無愁老夫貂鼠裘。降旗搖動臺城秋。生
綃束縛檻車去。始信人間果有愁。

門有車馬客行

門有車馬客云是故鄉人執手前借問鄉語知情真
自云別故鄉觀光京國塵經商涉代北薄官往西秦
繡鳳錦鴛鴦金鞍紫騏驎結交貴公卿出入擁衆賓
劇孟氣方銳郭解家不貧但見三春花寧思秋露晨
斷蓬失其根風沙歛漂淪前途塞虎狼故里荒荆榛
昔爲橫海鯨今爲涸轍鱗話言未及竟涕淚各盈巾
居家倚骨肉出家倚交親何當在異縣見此舊里鄰
園蔬如蜜甘市酒若醴醇悲歡且棄置生死同苦辛
短歌有深情情深難具陳

煌煌京洛行

齊謳且輟唱吳趨亦停聲請君傾耳聽聽我歌洛京
京洛何煌煌卜宅自周王五服畫九州茲爲土中央
用文四戰地恃德不恃強叔世道雖微靈源瀉流長
漢祖殪秦項定都由子房馬上得天下繼周焉敢當
光武起白水龍飛掃攬捨應天順民心戡暴安痍傷
冕旒正宸極圭組崇俊良功臣列爵土循吏勸耕桑
詔書報臧馬玉關閉西羌周巖播高風卓魯樹甘棠
廷無乳帛伏邑有馴雉翔涓涓醴泉液燁燁朱草芳
繼體更賢能守成不踰常南郊尊上帝宗祀親明堂
辟雍養耆德靈臺觀祲祥南宮畫元勳東觀昭文章

詩書母后訓，遙侈蕃封。防百年天再闢，四帝日重光。
傾昃自滿盈，宴安生怠荒。刑官竊威柄，義士死道旁。
釁積千里草，禍成一星黃。大命始不摯，餘暉尚悠揚。
典午亦有初，言治稱太康。用人混哲否，孽芽出蕭牆。
兄弟相啖食，同氣成豺狼。金墉豈不固，清談漫洋洋。
妖星入太極，胡雛登御床。銅駝荆棘沒，寢廟狐狸藏。
落日照西城，寒雲歸北邙。輶轅無人行，伊洛廣且長。
衰榮若且暮，道德信金湯。殷勤京洛篇，厥鑒不可忘。

靜夜思

靜夜思一思腸百轉，啼螿當戶聽。不聞明月在庭看，

不見方將入海，刺猛蛟復欲度嶺。邀飛猱胸中倏忽，
亂憂喜得喪紛紛。竟何是靜夜思，思無窮。天雞一聲，
海日紅滿頭，白髮吹秋風。

銅爵臺

高臺窅兀連蒼穹，中有艷質如花紅。君王已作西陵
土，總帷玉座空。秋風向陵舞，罷寒月白蒼狐夜啼松。
淚滴冢中枯骨寧，有知翠袖珠袍爲誰色。當其奮臂
譙許間，手揮群雄如刈管。橫矛賦詩逞豪傑，猛氣可
以移南山。寧知暮年壯心死，遺教但聞令賣履。啼噓
涕泣兒女態，遺臭至今猶未已。君不見永安宮中顧

命時天下英雄人得知

薤露歌

蜀琴且勿彈，齊竽且莫吹。四筵並寂聽，我薤露詩。
 昨日七尺軀，今日為死屍。親戚空滿堂，魂氣安所之。
 金玉素所愛，棄捐篋笥中。佩服素所愛，淒涼掛悲風。
 妻妾素所愛，洒淚空房櫳。賓客素所愛，分散各西東。
 離者自相快，親者自相悲。有耳不復聞，有目不復窺。
 譬彼燭上火，一滅無光輝。譬彼空中雲，散去絕餘姿。
 人生無百歲，百歲復如何。誰能將兩手，挽彼東逝波。
 古來英雄士，俱已歸山阿。有酒且盡歡，聽我薤露歌。

別裁載薤露歌
 一首云人生無
 百歲百歲復如
 何古來英雄士
 俱已歸山阿蓋
 節取此四句也

蒿里曲

澗草萋萋泉汨汨，紫蘭香老棠梨發。山中無人松柏
 寒，卧聽狐狸嘯明月。
 山花冥冥啼子規，鳥銜紙錢掛花枝。山中遊人莫相
 咲，君到此中當自知。

秋思

蕙草芳已歇，候蟲寒不鳴。相知惟白髮，日夜滿頭生。
 露出階苔光，風生庭樹冷。推窓掩明月，不忍見孤影。

古鏡詞并序

金陵武生於勾曲，野人得古墓中鏡，李桓先生辨

其欵製燕石上有元康年字定其為漢時物今雖不能灼見其非晉而漢然其來之不近則明矣

百鍊青銅曾照膽千年土蝕萍花屢想得玄宮初閉時金精夜哭黃鳥悲魚燈引魂開地府夜夜晶光射幽戶盤龍隱見自有神神物豈肯長湮淪願借蟾蜍騎入月將與嫦娥照華髮

琅琊王歌

駿馬須好鞍強弓須勁箭將軍不知兵健兒空自健四通八達琅琊道快馬如龍踏烟草草淒淒烟漠漠陌頭風起桃花落

長相思

長相思在瀛洲蓬萊之山忽沉浮弱水無風亦倒流鯨魚一吸吞九牛旋淵呀呷鳴其喉青鳥飛去天悠悠嗟我欲往徒離憂

長相思在蒼梧九疑愁雲隔明都湘神淚滴湘水枯冥冥霧雨啼短狐楓林沉陰天色晡鳳皇不食鴟鴞呼嗟我欲往空長吁

長相思在昆侖黃河怒浪訇天門天開石裂龍駿奔羲和縣車光未暎岷峨雲埋蜀帝魂流沙千仞沉轡轅嗟我欲往難窮源

自君之出矣

自君之出矣，雲鬢愁不縮。思君如轆轤，倏忽心百轉。

美人燒香詞

翡翠釵梁雲作葉，膩紅深暈桃花頰。玉奴纖手捲蝦鬚，繡羅襪小不勝扶。低頭背人整裙帶，神前獨自深深拜。翠袖輕迴香霧分，細語悠悠聽不聞。門外遊人空駐馬，冥冥白日西山下。

築城詞

君不見杭州無城賊直入，台州有城賊不入。重門擊柝自古來，而况四郊多警急。愚民莫可與慮，始見說

築城俱不喜，一朝城成不可踰。挈家却向城中居，寄語築城人，城高固自好，更須足食仍足兵。不然劔閣潼關且難保，獨不念至元延祐年，天下無城亦不盜。

畦桑詞

編竹為籬更栽刺，高門大寫畦桑字。縣官要備六事忙，村村巷巷催畦桑。畦桑有增不可減，準備上司來計點。新官下馬舊官行，牌上却改新官名。君不見古人樹桑在墻下，五十衣帛無凍者。今日路傍桑滿畦，茅屋苦寒中夜啼。

買馬詞

五乾隆本作三非

驛官亭鼓鼙鼙打驛使星馳買官馬府官奔走群吏
 趨呵叱縣官如使奴一時立限限鄉役馬價頓增無
 處覓賣田買馬來納官買時辛苦納時難縣官定價
 府官減驛驢也作駑駘者歸來拊膺向隅泣門前索
 錢風火急

神祠曲

路傍古廟壁半斜雨滴香案堆泥沙槎牙死樹當道
 臥樹上紙錢猶未化春秋祭祀知幾時烏鴉得食號
 相隨人人歡喜得好玃低昂拜跪山花飛寧知禍發
 在旦夕空村無烟唯瓦礫廟傍烏鴉亦不來獨留土

偶眠蒼苔

雨雪曲

北風吹塵沙雨雪日夜深三足之鳥毛毳飛不遠白
 晝慘淡成幽陰青天冥冥不可覩水有罔象路有虎
 平民避亂入山谷編蓬作屋無環堵回看故里盡荆
 榛野鳥爭食聲怒嗔盜賊官軍齊劫掠去住無所容
 其身嗚呼彼蒼何日回春陽北風雨雪斷人腸

遠客歎雨

遠客暮年筋力寡入門無家出無馬冷風一夜雨瀟
 瀟平明道上泥沒腰竈下濕薪不生火敲冰取水指

欲墮僕夫怨怒呼不前終日忍飢掩關坐憂來傷心
令髮白人生百身莫為客

女兒割股詞為徐勉之作

女兒少小幽閨裡深掩重簾學針指施朱傅粉有母
憐一朝無母將焉恃青燈背壁月當戶岷山之禽夜
啼苦丹元訴天天為愁淚洒長河作飛雨嗟兒與母
同為身母子分離何苦辛抽刀割股股不血一念自
感皇穹仁吾聞孝慈出天性人心至誠天必聽兒股
有肉母所育母生兒死兒亦足

秦女休行

戚列朝詩作撼
頗妥然戚亦通
故不敢妄改

秦家女兒美且都齒如編貝唇如朱有生不幸遭亂
世弱肉強食官無誅兄朝出門暮不返家人悵望空
倚閭女休聞之肝膽裂奮臂不惜千金軀援矛一擲
白日戚仇血上濺天糝糊市人驚譟塵土沸邏卒奔
走馳金吾有心殺人寧惜死顧謂女吏何其愚嫚法
長姦誰所致舍生得義吾何逋精誠通天天為側赦
書一夕來宸極路旁觀者咸歎嗟女休出門無喜色
君不見景升本初之子空是男亡家破國令人慙

蠻中歌

小兒負薪早已歸大兒采螺底不回海上檣竿齊入

浦山頭雲起颶風來

仙人詞

玉府仙人冰雪姿生來卽遣侍瑤池五雲隔斷塵凡
路說着人間總不知
上帝宸居儼肅森九關虎豹立峯峯群龍自有三珠
樹不見扶桑水淺深
東海鯨鯢白晝游南溟風浪湧吞舟三山亦在滄波
裡自是神仙未解愁

采蓮歌

十三女兒白似脂向人學得做嬌痴折得白蓮頭上
插苧羅山下賽西施
十五女兒花正開隨群逐伴采花回濃粧比似花嬌
艷引得黃蜂隊隊來
女伴相隨出芰荷並船比較采蓮多擡頭忽見遊人
過權入菰蒲水拍波
晚涼風定却回船望見新月在天邊放下荷花深深
舞翻身忙整翠花鈿

竹枝歌

陽臺雲雨漫荒唐巫峽啼猿枉斷腸莫向蒼梧山下
去九疑愁色滿瀟湘

在春來不改舊時青

雞鳴曲

莫厭晨鷄相應啼中原千里絕晨雞一匡自是無管
仲坐談不用誇曾西

塞姑

苔沒行蹤草沒堤滿簾紅日一鷺啼天涯那得真消
息不敢逢人問磧西
腸斷龍沙信不通夢中長怕醒時空夜來忽得榆關
報却憶傳聞是夢中

春曲

鳥恐鳥之誤

頤恐頤之誤

春天不雨亦不晴楊花飄盡池萍生庭鳥雜成巢燕
頤惟有杜鵑啼到明

春晴野煙生綠塘春遊綵女鉛華光碧雲日暮去何
處紅荇白蘋他自香

楊柳枝詞

多事垂楊管送迎長條折盡短條生不知幾許東風
裡猶帶輕烟罨晚晴
漢將營中萬樹春朱旗曉色動星辰可憐烟雨章臺
路翠縷斜縈走馬塵

憶昔春風白下亭桃紅李白柳青青繁華一夢今何

詩集卷之五
在露葉依稀似淚零

長干橋邊楊柳枝千條萬縷鬱金絲人來人去爭攀折無復青青映酒旗

淮水春晴碧簾紋楊花楊葉總成雲錦帆零落美人盡枝上流鶯誰獨聞

二月垂楊綠葉齊無朝無暮子規啼飛花袞袞向東去却被東風吹向西

枝上穠花吹漸稀樓前楊柳正依依春風解釋佳人恨故卷繁陰放燕歸

誠意伯詩抄卷之一畢

野呂公麟校字

48-13160



Handwritten notes in cursive script at the bottom left of the left page.

